

四庫全書

子部

欽定四庫全書

冊府元龜卷三百三 宗 王欽若等 撰

外戚部

褒寵

夫創業之君守文之主或奉長樂有昊天之感或念榆
秋有關雎之助故崇其外戚示之寵賁或引年而錫之
駟馬或數日而累夫千金至於五侯並封九卿絕席家
藏金穴出乘綠車屢讌飲於府第俾光震於都鄙其或

性蘊謙和心知止足既在舒而能卷終以榮而為懼則庶可以全其宗族終以牖下若彌肆貪叨昧失德義罔知畏夫天命卒相繼於覆轍者蓋比比有之著於簡編定為龜鑑

周申伯宣王之舅也王使申伯居謝故崧高之詩曰往

近王舅南土是保

近辭也聲如彼記之子之記

申伯信邁王餞于郟

郟地名邁行也申伯之意不欲離王室王告語之復重於人意解而信行餞送行飲酒也時王省岐周故於郟云

申伯還南謝于誠歸

還南者北就王命于岐周而還反也謝于誠歸誠歸于謝

漢衛青姊子夫武帝建元二年入宮得幸帝召青為建章監侍中及母昆弟貴賞賜數日間累千金

霍去病衛皇后姊少兒子也為驃騎將軍元狩六年薨帝悼之發屬國玄甲軍陳自長安至茂陵為冢象祁連山史高衛太子史良姊兄子也宣帝時為大司馬車騎將軍領尚書事元帝襲尊號高輔政五年乞骸骨賜安車駟馬黃金罷就第

史丹高子也元帝為太子丹為中庶子帝即位累遷左

將軍光祿大夫丹以舊恩數見褒賞賜累千金僮奴以百數永始中病乞骸骨帝賜策曰左將軍寢病不衰願歸治疾朕愍以官職之事久留將軍使躬不瘳使光祿勳賜將軍黃金五十斤安車駟馬及上將軍印綬宜專精神務近醫藥以輔不衰丹歸第數日薨

王鳳成帝舅也為大將軍鳳薨帝臨弔贈寵送以輕車介士軍陳自長安至渭陵

許嘉女為成帝后自元帝時為大司馬車騎將軍輔政

八九年成帝立欲專委任元舅王鳳迺策嘉曰將軍家
重身尊不宜以吏職自累賜黃金二百斤以特進侯就
朝位許后廢後帝憐許氏下詔曰蓋聞仁不遺遠誼不
忘親前平安剛侯夫人謁坐大逆罪家屬幸蒙赦令歸
故郡朕惟平恩戴侯先帝外祖魂神廢棄莫奉祭祀念
之未嘗忘于心其還平恩侯旦及親屬在山陽郡者

王莽孝元皇后弟子也為大司馬哀帝立免就第公卿

大夫多稱之者帝乃加恩寵置使家中黃門

使黃門在
其家中為

使今日一賜餐下詔曰新都侯莽憂勞國家執義堅固

朕庶幾與為共治太后詔莽就第朕甚憫焉其以黃郵

聚戶三百五十益封

黃郵在南陽棘陽縣

位特進給事中朝朔望

見禮如三公

見天子之禮也

車駕乘綠車從

後漢樊宏光武之舅也光武即位拜光祿大夫位特進

次三公每當朝會輒迎期先到俯伏待事時至乃起帝

聞之常賜駟騎臨朝乃告勿令豫到宏卒賻錢千萬布

萬疋謚為恭侯贈以印綬車駕親送葬子儵嗣帝悼宏

不已復封少子茂為平望侯明年賜僚弟鮪及從昆弟
七人各錢五十萬儵謹訥有父風事後母至孝及母卒
哀思過禮毀病不自支光武常遣中黃門朝暮送饘粥
張況族姊為皇祖考夫人數往來南頓見光武光武為
大司馬過邯鄲況為郡吏謁見光武光武大喜曰乃今
得我舅乎因與俱北到高邑以為元氏令遷涿郡太守
時年八十不任兵馬上疏乞身詔許之後詔問起居何
如子歆對曰如故詔曰家人居不足贍且以一縣自養

復以况為常山關長

郭况光武郭后弟也更始二年光武擊王郎至真定因納后有寵后即真定王劉楊之甥也帝納后以結之迺

與楊及諸將置酒郭氏漆里舍

漆里即郭后所居之里名也

楊擊筑

為歡后弟况十六為黃門侍郎建武十七年后廢為中山太后二十六年后母郭主薨帝親臨喪送葬百官大會遣使者迎父昌喪柩與主合葬追贈昌陽安侯印綬謚曰思侯二十八年帝憐郭氏詔况子璜尚清陽公主

除璜為郎遷大鴻臚帝數幸其第會公卿諸侯況家飲
譙賞賜金錢縑帛豐盛莫比京師號況家金穴明帝即
位況與帝舅陰識陰就並為特進數受賞賜恩寵俱渥
禮待陰郭每事必均永平二年況卒贈賜甚厚帝親自
臨喪永和三年章帝北巡狩過真定會諸郭朝見上壽
引入倡飲甚歡

說文曰倡樂也聲類曰俳

以太牢具上郭主家賜粟

萬斛錢五十萬

陰陸光武光烈陰后之父后初為貴人建武九年有盜

劫殺后母鄧氏及弟訢帝甚傷之乃詔大司空曰吾微賤之時娶於陰氏因將兵征伐遂各離別幸得全安俱脫虎口以貴人有母儀之德宜立為后而固辭弗敢當列於媵妾朕嘉其義讓許封諸弟未及爵土而遭患逢禍母子同命愍傷于懷小雅曰將恐將懼惟予與汝將安將樂汝轉棄予風人之戒可不慎乎其追爵謚貴人父陸為宣思哀侯弟訢為宣義恭侯以弟就嗣哀侯鄧晨南陽新野人娶光武姊元漢兵起元先遇害光武

即位晨為偏將軍感姊沒於亂兵追封元為新野節義
公主立廟於南陽縣西封晨子汎為吳房侯以奉公主
之祀建武三年徵晨還京師數燕見說故舊平生為歡
十八年行幸章陵以晨行廷尉事從至新野置酒酣讌
賞賜數百千萬二十五年卒詔遣中謁者備公主官屬
禮儀招迎新野主魂與晨合葬於北邙乘輿與中宮親
臨喪送葬

李通南陽宛人尚光武女弟寧平公主建武六年引拜

大司空通布衣唱義助成大業重以寧平公主故特見親寵然素有消疾自為宰相謝病不視事連年乞骸骨帝每優寵之令以公位歸第養疾光武每幸南陽常遣使者以太牢祠通父冢十八年卒帝及皇后親臨弔送永平中明帝幸宛詔諸李隨安衆安衆侯劉宗室會見崇後也並受賞賜恩寵篤焉

馬廖明德馬后之兄章帝甚尊重之建初四年以特進侯就第永元四年卒和帝以廖先帝之舅厚加賜贈使

者弔祭王主會喪馬防廖弟也永平為車騎將軍城門
校尉貴寵最盛與九卿絕席屢表辭位以特進就第尋
拜光祿勳防子鉅為常從小侯以小侯得
拜為黃門侍郎明帝親御章臺下殿陳鼎俎自臨冠之
明年復以病乞骸骨詔賜中山王田廬以特進就第

馬嚴明德皇后父援之兄子也明帝召見詔留仁壽園
常與宗室近親論議政事甚見寵幸拜御史中丞除子

鱣為郎令勸學省中

前書王鳳薦班伯於成帝
宜勸學台見宴昵殿是也

鄧衍為新野功曹永平初以外戚小侯每豫朝會而容
姿趨步有出於衆明帝目之顧左右曰朕之儀貌豈若
此人特賜輿馬衣服

竇憲女弟為章帝皇后憲與弟篤兄弟親幸並侍宮省
賞賜累積寵貴日盛

鄧騭和熹皇后之兄也殤帝延平元年率兵擊涼部叛
羌西屯漢陽徵騭班師朝廷以太后故遣五官中郎將
迎拜騭為大將軍軍到河南使大鴻臚迎中常侍齎牛

酒郊勞王侯以下候望於道既至大會羣臣賜帛乘馬
寵靈顯赫光震都鄙

梁竦二女皆為章帝貴人生和帝永元九年梁松子扈
遣從兄禮奏記三府以為漢家舊典崇貴母氏而梁貴
人親育聖躬不蒙尊號求得申議太尉張酺引禮訊問
事理會後召見因白禮奏記之狀帝感慟良久曰以君
意若何酺對曰春秋之義母以子貴漢興以來母氏莫
不隆顯臣愚以為宜上尊號追慰親靈存錄諸舅以明

親親帝悲泣曰非君孰為朕思之會貴人姊南陽樊調

妻嬖

嬖音於計切

上書自訟曰妾同產女弟貴人前充後宮

蒙先帝厚恩得見寵幸皇天授命誕生聖明而為竇憲兄弟所見譖訴使妾父竦寃死牢獄骸骨不掩老母孤弟遠徙萬里獨妾遺脫逸伏草野常恐沒命無由自達今遭值陛下神聖之運親統萬機羣物得所憲兄弟姦惡既伏辜誅海內曠然各獲其宜妾得蘇息拭目更視乃敢昧死自陳於天妾聞太宗即位薄氏蒙榮宣帝繼

統史族復興妾門雖有薄史之親獨無外戚餘恩誠自
悼傷妾父既寃不可復生母氏年殊七十及弟棠等遠
在絕域不知死生願乞收竦朽骨使母弟得歸本郡則
施過天地存沒幸賴帝覽章感悟乃下中常侍掖廷令
驗問之媼辭証明審遂得引見具陳其狀乃留媼止宮
中連月乃出賞賜衣被錢帛第宅奴婢旬月之間累資
千萬媼素有行操帝益愛之加號梁夫人擢樊調為羽
林左監復詔三公大鴻臚曰夫孝莫大於尊尊親親其

義一也詩云父兮生我母兮鞠我撫我畜我長我育我
顧我復我出入腹我欲報之德昊天罔極朕不敢興事
覽於前世中宗太宗實有舊典追命外祖以篤親親其
追封謚皇太后父竦為褒親愍侯比靈文順成愍侯魂而
有靈嘉斯寵榮好爵顯服以慰母心遣中謁者與嫗及
扈備禮西迎竦喪詣京師改殯賜東園畫棺玉匣衣衾
建塋於恭懷皇后陵傍帝親臨送葬百官畢會徵還竦
妻子諸子封侯位皆特進賞賜第宅奴婢車馬兵弩什

物以巨萬計寵遇光於當世諸梁內外親疎並補郎謁者

馮魴孫石襲母獲嘉長公主封獲嘉侯亦為侍中稍遷衛尉能取悅當世為安帝所寵帝常幸其府留飲十許日賜駸犀具劍佩刀紫艾綬玉玦各一拜子世為黃門侍郎世弟二人皆中郎自永初兵荒王侯租稅多不充於是特詔以它縣租稅足石令如舊限歲入穀三萬斛

錢四萬

梁商女為順帝皇后商為大將軍卒朝廷賜以東園朱壽之器銀鏤黃腸玉匣什物二十八種錢二百萬布三千匹皇后錢五百萬布萬疋及葬贈輕車介士賜諡忠侯中宮親送帝幸宣陽亭瞻望車騎

初帝作誅曰孰云忠侯不聞其音背

去國家都茲玄陰幽居冥冥靡所宜窮者也

梁冀商之子也元嘉元年桓帝以冀有援立之功欲崇殊典乃大會公卿共議其禮於是有人司奏冀入朝不趨劍履上殿謁贊不名禮儀比蕭何悉以定陶陽城餘戶

增封為四縣比鄧禹賞賜金錢奴婢彩帛車馬衣服甲
第比霍光以殊元勲每朝會與三公絕席十日一入平
尚書事宣布天下為萬世法冀猶以所奏禮薄意不悅
王斌女弟為靈帝美人生獻帝為何皇后所酖殺獻帝
即位求斌斌將妻子詣長安賜第宅田業拜奉車都尉
遷執金吾封都亭侯病卒贈前將軍印綬謁者監護喪
事

魏卞秉武宣皇太后弟也當建安時為別部司馬文帝

為秉起第第成太后幸第請諸家外親

毛嘉明帝悼后之父也帝以嘉為奉車都尉嘉子曾為
騎都尉寵賜隆渥帝令朝臣會其家宴飲

晉羊琇景獻皇后從父弟為散騎常侍琇卒武帝手詔
曰琇與朕有先后之親少小之恩歷位外內忠允茂著
不幸早薨朕甚悼之其追贈輔國大將軍開府儀同三
司賜東園秘器朝服一襲錢三十萬布百疋

宋徐湛之父遠之尚高祖長女會稽公主討司馬休之

見害湛之幼孤為高祖所愛常與江夏王義恭寢食不離於側位至尚書令

臧質武敬皇后弟子也為義興太守元嘉二十六年文帝謁京陵質朝丹徒上禮帝設饌盡歡賜布千疋

路瓊之孝武帝母路太后弟子也大明中瓊之及弟休之茂之並超顯位太后賜與瓊之等財物家累千金居處服器與帝子相伴瓊之終衡陽內史

南齊何瑀尚高祖少女豫章公主公主與瑀情愛隆密

何氏外姻疎戚莫不霑被恩紀歷位清顯

王績女適武帝寵子安陸王子敬永明三年納妃修外舅
姑之敬武帝遣文惠太子相隨往績家置酒設樂公卿
皆冠冕而至當世榮之

何戢為撫軍將軍爵林王妃父也王即位妃為后迎后
親戚入宮賞賜人百數十萬

梁張弘籍高祖舅也高祖即位詔曰亡舅齊鎮西參軍
風素雅亮夙肩名輩降年不永早世潛輝朕少罹苦辛

情地彌切雖宅相克成輅車靡贈興言永往觸目傷心
可追贈廷尉卿

張弘策文獻皇后從父弟從高祖平建康累遷衛尉卿
為東昏餘黨所害詔曰亡從舅衛尉慮發所忽殞身妖
豎其情理清貞器識淹濟自藩升朝契濶夷阻加以外
氏彫衰饗嘗屢絕興感渭陽情寄斯在方賴忠勳翼宣
寡薄報效無徵永言增嘆可贈散騎常侍車騎將軍給
鼓吹一部謚曰愍

王錫義興公主子也為太子洗馬時昭明尚幼未與臣
察相接高祖嘗勅昭明日太子洗馬王錫秘書郎張縉
縉弘策子也親表英華朝中髦俊可以師友事之中大通六
年卒年三十六贈侍中給東園秘器朝服一襲

陳沈君理為吏部尚書女為皇太子妃宣帝太建五年
為右僕射有疾車駕親臨視卒贈侍中太子少傅喪事
所須隨由資給太子立為後主妃為后宗族多有顯官
張種為紫金光祿大夫太建初女為始興王妃以居處

僻陋特賜宅一區又累賜無錫嘉興縣侯秩

柳莊後主從舅也為右衛將軍兼中書舍人太后弟盼卒後太后宗屬唯莊為近由是深被恩遇

後魏杜超明元密皇后之兄始光中太武追念舅氏封超平陽公尚南安長公主拜駙馬都尉車駕幸其第賞賜巨萬又追加超父豹鎮東大將軍陽平景王母曰鉅鹿惠君真君五年超為帳下所害太武臨其喪哀慟者久之謚曰威王子鳳皇襲超爵加侍中特進太武追思

超不已欲以鳳皇為定州刺史鳳皇不願違離闕庭乃
止

姚黃眉明元昭哀皇后之弟又尚陽翟公主累拜太常
卿卒贈雍州刺史隴西郡王謚曰獻黃眉寬和溫厚希
言得失太武惜悼之故贈有加禮

馮熙文明太后之兄也後孝文又納其女為后詔曰白
虎通云王所不臣數有三焉妻之父母抑言其一此所
謂供承宗廟不欲奪私心然吾季著於春秋無臣證於

往諫既許通體之一用開至尊之敬比長秋配極陰政
既數未聞有司陳奏斯式可詔太師輟臣從禮又勒集書
造儀付外孝文前後納熙三女二為后一為左昭儀由
是馮氏寵貴益隆賞賜累巨萬孝文每詔熙上書不臣
入朝不拜熙後遇疾綿寢四載詔遣醫問道路相望車
駕亦數幸焉將遷維孝文親與別見其困篤歔流涕
密敕宕昌公王遇太師萬一即可監護喪事十九年薨
於代車駕在淮南留臺表聞還至徐州乃舉哀為制總

服詔有司豫辦凶儀并開魏京之墓令公主之柩俱向
伊維凡所營送皆公家為備又勅代給綵帛前後六千
足以供凶用皇后詣代都赴哭太子恂亦赴代哭弔將
葬贈假黃鉞侍中都督十州諸軍事大司馬太尉冀州
刺史加黃屋左纛備九錫前後羽葆鼓吹皆依晉太宰
安平獻王故事有司奏謚詔曰可以威強恢遠曰武奉
謚於公柩至七里澗孝文服總往迎叩靈悲慟而拜馬
葬日送臨墓所親作誌銘熙子誕與孝文同歲幼侍書

學後除侍中都督中外諸軍事中軍將軍特進改封長樂郡公誕拜官孝文立於廷遙受其拜既訖還室

楊播母文明太后之外姑也播為中散累遷給事領中起部曹以外親優賜亟加前後萬計

陸昕之尚獻文女常山公主拜駙馬都尉昕之容貌柔謹孝文以其主壻特垂昵眷宣武時年未四十頻撫三蕃當世以此榮之

鄭義女為孝文嬪徵為秘書監太和十六年卒賜帛五

百疋

高肇文昭皇太后之兄也肇父颺鷹威將軍既卒宣武
追思舅氏徵肇兄弟等錄尚書事北海王詳等奏颺宜
贈左光祿大夫賜爵渤海公謚曰敬封肇平原郡公肇
弟顯澄城郡公引見於華林都亭皆甚惶懼舉動失儀
數日之間富貴赫奕

胡國珍靈太后之父也封安定郡公進位中書監儀同
三司侍中如故賜絹歲八百疋妻梁四百疋男女姊妹

各有差仍詔依漢車千秋晉安平王故事給步挽一乘
自掖門至於宣光殿得以出入並備几杖

李延寔為左將軍光州刺史莊帝即位以元舅之尊超
授侍中太保封濮陽郡王延寔以太保犯祖諱又以王
爵非庶姓所宜抗表固辭徙封濮陽郡公改授太傅

李遵孝武初以外戚超贈車騎大將軍儀同三司定州
刺史

蕭贊尚莊帝女壽陽長公主為齊州刺史為城民趙維

周所逐公主被錄還京贊未幾卒節閔普泰末勅迎其喪至
雖遣黃門郎鹿念護喪事以王禮與公主合葬嵩山

鄭伯猷為散騎常侍東平將軍前廢帝初以舅氏超授
征東將軍金紫光祿大夫領國子祭酒

胡虔國珍之孫也為司空孝靜興和中薨贈太傅太尉
公尚書僕射徐州刺史葬日百官會葬乘輿送於郭外
羅鑿為散騎常侍金紫光祿大夫主衣都統卒孝靜以
外戚故贈侍中冀定瀛三州諸軍事尚書右僕射司空

公衛將軍冀州刺史

後周李弼子暉尚文帝女義安長公主故遂以為嗣暉
初贈爵義城郡公嘗臥疾暮年文帝憂之賜錢一千萬
供其藥石之費

隋呂雙周高祖外祖也其族蓋微平齊之後求訪不知
所在至開皇初濟南郡上言有男子呂永吉自稱有姑
字若桃嫁為楊忠妻勘驗知是舅子始追贈雙周為
上柱國太尉八州諸軍事青州刺史封齊郡公謚

曰敬外祖母姚氏為齊敬公夫人詔並改葬於齊州立廟置守冢十家以永吉襲爵在京師

獨孤羅文獻皇后之兄信之長子高祖為丞相儀同常置左右既受禪下詔追贈羅父信官爵曰褒德累行往代通規追遠慎終前王盛典故柱國信風宇高曠獨秀生民睿哲居宗清猷映世宏謀長策道著於弼諧緯義經仁事深於拯濟方當宣風廓廟亮采台階而運厲艱危功高不賞曠言令範事切於心今景運初開椒闈肅

建載懷塗山之義無忘褒紀之典可贈太師上柱國冀
定等十州刺史趙國公邑萬戶其諸弟以羅母沒齊先
無夫人之號不當承襲帝以問后后曰羅誠嫡長不可
誣也於是襲爵趙國公諸弟皆封郡公

豆盧勣為夏州總管文帝以其家貴盛勳效克彰後為
漢王諒納其女為妃恩遇彌厚七年追守利州功詔食
始州臨津縣邑千戶

獨孤陔信之第四子煬帝即位追念舅氏聽以禮葬乃

下詔曰外氏衰弱獨孤阨不幸謝世遷下有期言念渭陽之情追懷傷切宜遵禮命允備哀榮可贈正議大夫帝意猶不滿復下詔曰舅氏之尊戚屬斯重而降年弗永彫落相繼緬維先往宜崇秩復贈銀青光祿大夫竇榮定初仕周為佺飛中郎將其妻則高祖姊安成長公主也帝作相拜為雒州總管留後賜縑千疋西涼女樂一部帝受禪來朝京師帝顧謂羣臣曰朕少惡輕薄性相近者止榮定而已賜馬三百匹部曲八十二人而

旌之坐事除名帝以長公主之故猶拜右武侯大將軍
數幸其第恩賜甚厚每令尚食局日供羊一口珍味稱
是後為秦州總管賜吳樂一部前後賞賜不可勝計開
皇六年卒帝為之廢朝令左衛大將軍元旻監護喪事
賻絹三千疋帝謂侍臣曰吾每欲致榮定於三事其人
固讓不可今欲贈之重違其志於是贈冀州刺史陳國
公

豆盧通尚高祖妹昌樂長公主自是恩禮漸隆遷夏州

總管洪州總管

柳述冀州刺史機子也以父蔭為太子親衛開皇中尚蘭陵公主述於諸婿中高祖特所寵敬歲餘判兵部尚書事

李敏妻高祖樂平公主女敏歷金邠華岐數州刺史多不蒞職常留京師往來宮內侍遊宴賞賜超于功臣大業初補衛尉卿樂平公主將薨遺言於煬帝曰妾惟一女不自憂死深憐之湯沐乞迴與敏帝從之

獨孤懷恩者父為涿郡太守高祖以其獻皇后之姪養於宮中

蕭綜自江陵入朝賜爵莒國公煬帝以皇后之故甚見親重綜族總麻以上並隨才擢用於是諸蕭昆弟布列朝廷

唐竇抗隋陳國公榮定子太穆皇后之從兄其母隋高祖姊也父卒之後高祖恩遇彌隆所賜錢帛金寶亦以巨萬武德初歸長安高祖見之悅握手命坐曰李氏竟

能成事何如抗舞蹈奉賀因縱酒為樂累遷納言帝每臨朝常引與坐退朝之後延入臥內命之捨敬縱酒談謔敦平生之款常侍宴私時或留宿禁內帝常呼之為兄而不名也內人咸稱為舅其見親如此初平東都冊勲太廟者九人抗與弟軌俱預焉論者榮之賜女樂一部金寶萬計

竇威太穆皇后從兄也武德初為內史令高祖甚親重之每引入臥內常為膝席又常謂之曰昔周朝有八柱

國之貴吾與公家咸登此職今我為天子卿為內史令
本同而末異無乃不可乎威拜謝曰臣家昔在漢朝再
為外戚至於後魏三處外家陛下龍興復出皇后臣又
階恩澤位忝鳳池自唯叨濫伏深悚息帝大笑曰公三
后族欲誇我耶關東人與崔盧為婚猶自矜伐公世為
帝戚豈非盛事

裴弘策仕隨為將作大匠卒武德初追贈弘策工部尚
書黎國公策妻竇太穆皇后妹也以舊姻贈焉

長孫敞文德皇后叔父也義旗初建率子弟起於新豐後為巴州刺史後坐事免太宗以後親常令內給絹以供私費及致仕卒謚曰良陪葬昭陵

蕭瑀為內史令高祖每臨軒聽政必賜升御榻瑀既獨孤氏之壻帝與語呼之為蕭郎

長孫無忌文德皇后兄也太宗即位為吏部尚書帝以其佐命元勳地兼外戚禮遇尤重常出入臥內密與謀議又嘗作威鳳賦以賜之貞觀十二年十二月又幸其

第睦勲戚也高宗即位以無忌為太尉同中書門下三品既當元舅之任高宗每事皆諮稟之賞賜優寵近古無比又令圖無忌形像親為書贊

房遺愛司空玄齡第二子也以功臣子弟尚高陽公主有寵禮命與諸婿絕異

獨孤開遠元貞皇后兄子也為左衛將軍卒太宗登苑西樓臨送開遠之葬

楊師道尚桂陽公主為太常卿駙馬都尉安德郡公卒

贈吏部尚書荊州都督賜東園秘器陪葬昭陵并為立碑

武士護高宗皇后父也顯慶四年三月甲申故荊州都督贈司徒周定公士護配享高祖廟庭賜其家魏州實封一千戶總章元年又詔贈司徒荊州都督忠孝公士護並諸功臣時皇后欲褒隆其父故并贈功臣咸亨元年九月甲申后母衛國夫人楊氏薨贈魯國太夫人謚曰忠烈司刑太常伯盧承慶攝同文正卿充使監護西

臺侍郎戴至德持節弔祭命文武九品以上及親戚五等以上并外命婦並聽赴宅弔哭葬及墳塋鹵簿等一事已上並依王禮給班劍四十人羽葆鼓吹儀仗送至墓所往還其文武官九品以上並至渭橋宿次外婦諸親婦女並送至墓所官為立碑仍令特進許敬宗為其文士辰皇后請為夫人度太平公主出家為女官并請頒政坊民置女官觀休祥坊宅置僧寺兼各度人追福並從之閏九月壬子又詔故工部尚書贈司徒周忠孝

公士彛加贈太尉兼太子太師太原郡王魯國忠烈大夫人加贈太原郡王妃所司備禮冊命

韋玄貞中宗皇后父也為豫州刺史卒神龍元年追贈上雒郡王左拾遺賈虛已諫之疏不納九月詔令改葬玄貞其儀准太后父太原王故事初帝遷於房陵玄貞坐配流欽州死后母崔氏為欽州首領寧承基兄弟所殺玄貞有四子洵浩洞泚等時亦死於容州至是制遣使迎玄貞及崔氏喪柩歸於京師贈賻甚厚又遣廣州

都督周仁軌率兵二萬斬討竇承基兄弟以其首祭崔氏墓又追贈洵吏部尚書汝南郡王浩太常卿武陵郡王洞衛尉淮陽郡王泚太僕卿上蔡郡王亦遣使迎其喪柩歸葬於京師及將至帝與后幸長樂宮望喪而泣是年又以安車備禮徵安平郡王武攸緒攸緒則天之兄子隱於嵩山積十餘年至是徵之攸緒至擢授太子賓客仍聽其還山二年四月又改贈玄貞為豐王仍號廟曰褒德陵曰榮光仍各置官員并給戶一百人守衛

灑掃五月再追贈玄貞為太師雍州牧并益州大都督
伯父贈太常卿玄儼為特進荊州大都督封魯國公追
封從祖伯父十餘人皆為上州刺史仍贈爵郡公

竇希瓘玄宗舅也希瓘後名瓊

音

開元初甚見優寵兄

弟三人皆封國公帝以早失太后尤寵之恩錫之盛朝
夕相繼天寶七載詔曰睦親之義因心不忘前開府儀
同三司竇瓊頃以容納微人頗虧典憲永懷舅氏追感
渭陽宜伸國恩再復榮秩可開府儀同三司仍放優閑

不須朝會卒贈司徒

竇希城希瓘兄也開元二年自光祿卿授太子少傅詔
光祿造食公卿送上以外戚優其禮也開元五年喪輟
朝三日贈司空兼荊州大都督賻物八百段米粟八百
石賜東園秘器凶事葬事並官供務從優厚仍令將作
大匠韋湊充使監護河南少尹秦守一為副鴻臚少卿
李顥持節充使齋璽書帛祭儀仗送至墓所官為立碑
竇希玠希城弟也為開府儀同三司華國公開元二年

堯帝悼之下制曰存有其榮歿有其贈古之典也希玠有賢戚之美登台階之秩冀其永年俾作元老不幸堯逝用震悼於厥心可贈尚書左丞相

王仁皎為開府儀同三司初玄宗在藩聘仁皎女為妃及嗣位妃為皇后仁皎以後父之重不參朝政承厚賜賚善自奉養開元七年卒帝親為舉哀輟朝三日贈太尉益州都督制曰在昔王者旌賢睦姻莫不存貴寵光歿加禮冊故開府儀同三司王仁皎神仙望族禮樂通

材履道純粹執心夷簡自大邦有子中闈作合以外舅
之勞參上公之位績宣揚歷誠著始終方保期頤遽從
薨落興言震悼用惻于懷宜依常典式慰塋魂可贈益
州大都尉贈物三千段米粟二千石喪葬事並官供務
從優厚仍賜東園秘器宜令銀青光祿大夫守工部尚
書上柱國彭城郡開國侯劉知柔攝鴻臚卿監護通議
大夫行京兆尹上護軍崔琬為副銀青光祿大夫守太
子詹事上柱國安南縣開國侯龐承宗持節齋書帛祭

左庶子上護軍白知慎為副在京五品已上官更須就
弔官為立碑命張說為其文親書石焉

薛談尚玄宗女常山公主拜駙馬都尉卒贈光祿卿賻
物一百段粟一百石官給葬事仍令京兆尹充監護使
張洎尚玄宗女寧親公主又尚信興公主為翰林學士
以主壻帝特深寵異許於禁中置內宅侍為文章賞賜
珍玩不可勝數時兄均亦供奉翰林院常以所賜示均
均戲謂曰此婦翁與女婿非天子賜學士也

姜慶初尚新平公主拜駙馬都尉新平玄宗之女也敏
慧習文墨帝賢之諸主中恩禮加重慶初由是承恩駙
馬都尉鮮有授正員官者慶初特拜太常卿先是宗正
寺奉陵廟慶初以恩幸太常復奉園陵

獨孤穎為左威將軍錄事參軍卒大歷三年追贈工部
尚書穎代宗貴妃之父也將冊貴妃乃加寵焉

王延昌為吏部侍郎卒大歷四年追贈吏部尚書特賜
賻絹一百疋布五十疋延昌妻獨孤氏貴妃之姑也是

用加等

郭曖汾陽郡王子儀第六子也十餘歲尚代宗第四女昇平公主時昇平年亦與曖相類大厯中恩寵冠於戚里歲時錫賚珍玩不可勝紀曖子昭以外孫故亦恩寵特異

柳晟駙馬都尉潭之子女肅宗女和政公主晟少無檢操代宗於諸甥之中特加獎遇俾讀詩書與皇太子諸王同處親寵之盛貴戚無比授試太常卿

沈令瑤代宗外叔祖也累官至涇傳集賢侍典舊勳齊
列大厯八年卒輟朝三日帝追悼優詔贈太子少保父
易直先贈秘書監德宗建中元年七月癸丑贈太師故
庫部員外沈介福贈太傅故德州刺史沈士衡贈太保
易直睿真皇后之父帝外祖也介福易直之父也士衡
介福之父也秘書少監沈震贈太尉易直之子也沈氏
贈三公保傅僕射尚書已上諸官及封邑者百餘人

王遇昭德皇后父也貞元三年贈揚州大都督賜布絹

四百段米粟三百石葬事一切官給遇子眉州司馬果及甥姪等進官者二十餘人

田季安為魏博節度使季安代宗女嘉誠公主子也德宗優之比河朔諸鎮為厚

沈蟻尚憲宗女宣城公主拜駙馬都尉敬宗寶曆元年十二月賜蟻錢一萬并城南別墅昌化坊賈區各一所郭環為殿中少監寶曆二年二月賜環宅一區以才人將立為貴妃故寵異其兄也五月帝御宣和殿封環等

諸親

蕭洪文宗皇太后弟也太和二年十月賜絹五百疋錢三百千米粟一百石


後唐孟知祥為太原節度使同光三年冬蜀平十二月制以知祥依前檢校太傅同平章事充劍南西川節度副大使知節度事閏月己丑知祥自太原奉詔馳騎入維莊宗以知祥戚里之重預戒所司出內府供帳珍玩竒絕者別設宮居以宴之酒酣追思往昔事因曰吾輩

老矣繼岌乳臭兒今年代父破賊平定西川慰喜之外復增悲耳吾憶先帝棄代時疆境為賊所侵僅保一隅之地豈知今日君臨天下奇珍異器畢萃吾府卿為吾姻可得而言因指閔珠玉器服以示知祥又曰蜀土奢華富盛不異吾宮以卿戚里忠賢故以相付卿其勉之因令中使王允平就賜節鉞官誥

晉張從訓初為德州刺史高祖之鎮太原也為少帝娶從訓長女為妃從訓清泰初授唐州刺史三年高祖舉

義從訓奉唐末帝詔徵赴行在分領鄉兵次於團柏谷
兵敗宵遁潛身民間高祖入雒有詔搜訪月餘乃出焉
及見以戚里之故深加軫惻尋授唐州刺史

周符昭信魏王彥卿之子世宗皇后之弟也為天雄軍
衛內都指揮使顯德元年七月卒皇后於別宮舉哀宰
臣率文武百僚於門進名奉慰



冊府元龜卷三百三

欽定四庫全書

子部
冊府元龜卷三百四十五

詳校官中書臣王鵬

員外郎臣牛稔文覆勘

總校官庶吉士臣何思鈞

校對官助教臣卜維吉

謄錄監生臣魏淳耀

欽定四庫全書

冊府元龜卷三百四

宗 王欽若等 撰

外戚部

忠直

規諫

賢行

禮士

論薦

忠直

匪躬守節之謂忠方正無邪之謂直然則忠無不直直在其忠是以君子本忠節以成身篤正直而立志道無

不在德必有鄰漢魏以還葭莩之戚或正辭排難非義
莫干或竭節存誠惟善是與增霧露之潤明日月之輝
既受任而無慙亦國家而有賴垂於後也不其偉與

漢竇嬰字王孫竇太后從兄子孝景即位為詹事帝弟

梁孝王太后愛之孝王朝因燕昆弟飲

序家人昆弟之親不為君臣禮

也 是時帝未立太子酒酣帝從容曰千秋萬歲後傳王

從千太后驪嬰引卮酒進帝曰天下者高祖天下父子

相傳漢之約也上何以得傳梁王太后由此憎嬰嬰亦

薄其官

自嫌其官輕薄之也

因病免太后除嬰門籍不得請四年

立栗太子

栗姬之子故曰栗太子

以嬰為傅七年栗太子廢嬰爭

弗能得謝病屏居藍田山下

王商字子威宣帝時以舅子嗣封樂昌侯元帝時至右

將軍光祿大夫是時成帝為太子定陶共王愛幸幾代

太子

共讀曰恭幾巨依切

商為外戚重臣輔政擁佑太子頗有力

焉

佑助也

成帝即位甚敬重商徙為左將軍

王音元后從父弟為車騎將軍成帝時王氏爵位日盛

唯音爲修整數諫正有忠節

傅喜字稚遊哀帝祖母定陶傅太后從父弟哀帝初即位以喜爲衛尉遷右將軍是時王莽爲大司馬乞骸骨避帝外家帝既聽莽退衆庶歸望於喜喜從弟孔鄉侯晏親與喜等

俱太后從父弟也

而女爲皇后帝舅陽安侯丁明

皆親以外屬封喜執謙稱疾傅太后始與政事喜數諫之

與音豫

由是傅太后不欲令喜專政帝於是用左將軍

師丹代王莽爲大司馬賜喜黃金百斤上將軍印綬以

光祿大夫養病

班穉成帝班婕妤之兄弟平帝時太后臨朝王莽秉政

方欲文致太平

言欲以文致太平

使使者分行

音下更切

風俗博采

頌聲而穉無所上

不稱符瑞及歌頌

琅邪太守公孫闕言灾害

於公府大司空甄豐遣屬馳至兩郡諷吏民

遣言祥應而隱除灾

害而劾闕空造不祥穉絕嘉應嫉害聖政皆不道太后

曰不宣德美宜與言灾害者異罰且後宮賢家我所哀

也

班婕妤好有賢德故哀閔其家

闕獨下獄誅穉懼上書陳恩謝罪願

歸相印入補延陵園郎太后許焉食故祿終身繇是班氏不顯莽朝亦不惟咎

王閔元后母弟平阿侯譚之子哀帝時爲中常侍時幸臣董賢爲大司馬寵愛貴盛閔屢諫忤旨哀帝臨終以璽書綬付賢曰無妄以與人時國無嗣主內外憂懼閔白元后請奪之即帶劍至宣德後闈舉手叱賢曰宮車宴駕國嗣未立公受恩深重當俯伏號泣何事持璽綬以待禍至耶賢知閔必死不敢拒之乃跪授璽綬閔馳

上太后朝廷壯之及王莽篡位潛忌閎乃出爲東郡太守閎懼誅常繫藥手內莽敗漢兵起閎獨完全東郡三十餘萬戶歸降更始

後漢陰興光烈皇后母弟建武二年爲黃門侍郎守期門僕射典將武騎從征伐平定郡國興每從出入常操持小蓋障翳風雨躬履塗泥率先期門光武所幸之所輒先入清宮甚見親信雖好施接賓然門無俠客與同郡張宗上谷鮮于裒不相好知其有用猶稱所長而達

之友人張汜杜禽與興厚善以爲華而少實但私之以財終不爲言是以世稱其忠平

樊儵光武舅子明帝時爲長水校尉廣陵王荆有罪帝以至親悼傷之詔儵與羽林監南陽任隗雜理其獄事竟奏請誅荆引見宣明殿帝怒曰諸卿以我弟故欲誅之即我子卿等敢爾邪儵仰而對曰天下高帝天下非陛下之天下也春秋之義君親無將將而誅焉是以周公誅弟季友鳩兄經傳大之臣等以荆屬託母弟陛下

仁聖心加惻隱故敢請耳如令陛下子臣等專誅而已
帝歎息良久儉益以此知名

馬廖以明德皇后弟爲羽林左監虎賁中郎廖性質誠
忠慎不愛權勢聲名盡心納忠不屑毀譽

魏下蘭武宣皇后弟秉子爲奉車都尉嘗苦酒消渴時
明帝信巫女用水方使人持水賜蘭蘭不肯飲詔問其
意蘭言治病自當以方藥何信於巫帝爲變色後渴愈
甚以至於亡故時人見蘭好直言謂帝面折之而蘭自

殺其實不然

吳朱據大帝時尚公主拜左將軍赤烏九年遷驃騎將
軍遭二宮構爭據擁護太子言則懇至義形於色守之
以死曰臣聞太子國之本根雅性仁孝天下歸心今卒
責之將有一朝之慮昔晉獻用驪姬而申生不存漢武
信江充而戾太子冤死臣竊懼太子不堪其憂雖立思
子之宮無所復及矣

晉胡奮字玄威武帝時爲鎮軍大將軍泰始末女爲貴

人時楊駿以后父驕傲自得奮謂駿曰卿恃女更益豪
耶歷觀前代與天家婚未有不滅門者但早晚事耳觀
卿舉措適所以速禍駿曰卿女不在天家乎奮曰我女
與卿女作婢耳何能損益時人皆爲之懼駿雖銜之而
不能害

賈模以惠帝皇后從兄爲侍中乃盡心輔弼推張華裴
頽同心輔政數年之中朝野寧靜模之力也

王爽字季明孝武定皇后弟強正有志力歷給事黃門

侍郎侍中孝武末王國寶夜欲開門入爲遺詔爽拒之
曰大行宴駕皇太子未至敢入者斬乃止

隋獨孤開遠元貞皇后之兄子也爲左千牛及宇文化
及江都作逆開遠時在宿直遂率殿中數百人詣玄覽
門請戰鬥已爲賊所據不得通兵士稍引去開遠遂被
執化及義而不誅

唐蕭瑀初仕隋爲內史侍郎既以后弟之親委之機務
後數以言忤旨漸見疎斥

長孫無忌文德皇后兄也嘗從太宗征討累除比部郎中及隱太子建成等謀害太宗無忌請先發誅之於是奉密旨詔房玄齡杜如晦等爲籌略及難作無忌與尉遲敬德侯君集張公謹劉師立公孫武達獨孤彥杜公綽鄭仁泰李孟嘗等九人入玄武門討建成等平之

王同皎尚中宗女拜駙馬都尉神龍中以武三思專權任勢謀爲逆亂乃招集壯士期以則天靈駕發引劫殺三思同謀人撫州司倉冉祖雍具以其計密告三思三

思乃遣校書郎李悛上言同皎潛謀殺三思後將擁兵詣闕廢黜皇后帝然之遂斬同皎於都臺驛前籍沒其家臨刑神色不變天下莫不寃之睿宗即位令復其官爵執丹祖雍李悛並誅之

吳湊大歷中以章敬皇后弟為金吾將軍代宗誅宰相元載時王縉楊炎王昂韓洄包佶韓會皆當從坐籍沒湊百端救解以縉等罪未至極刑恐虧損聖德由是各貶官而已

湊兄淑建中初爲左金吾衛大將軍涇原兵叛駕幸奉
天盧杞白志貞稱朱泚必當向順固無背叛之事德宗
擇大臣可使者衆憚其行淑嘆息謂親友曰國難不能
死非人臣也吾忝恩戚知死所矣遂請使焉及至京城
賊泚勉勞如常儀淑退而泚逆謀已決因害淑於四方
館之前帝聞而哀悼久之

郭釗元和末以懿安皇后兄爲司農卿時憲宗寢疾彌
旬諸中貴人秉權廢立紛紛未定穆宗在東宮憂甚使

人問謀於釗釗曰殿下身爲皇太子但朝夕侍膳謹守以俟又何他慮乎迄今稱得元舅之體

規諫

傳曰近臣盡規又曰工執藝事以諫然則諫諍之道臣子之事自上下下靡不由之況在懿親寧忘忠盡其有葭茅近屬肺腑大臣位秩既崇委賴斯至或則握兵之要或則居帝之右或出入椒掖或陟降彤墀莫不義重君親理同休戚乃有秉純亮之操勵審諤之志獻可替

否以罄其深衷見危授命以全其大節至於朝政之愆缺國體之安危何嘗不進思盡忠彌縫其失孜孜以納誨惓惓以弼違言有逆於耳而拂於心事有利於上而益於國茲所謂親親之義知無不爲者焉

史丹元帝時爲駙馬都尉以宣帝外屬親信之詔丹護太子家是時傅昭儀子定陶共王有材藝子母俱愛幸而太子頗有酒色之失母王皇后無寵建昭之後元帝被疾不親政事留好音樂或置鞀鼓殿下天子自臨軒

檻上隕銅丸以擗鼓

隕下也
擗投也

聲中嚴鼓之節

莊嚴鼓
節也

後

宮及左右習知音者莫能爲而定陶王亦能之帝數稱

其材丹進曰凡所謂材者敏而好學溫故知新

敏速疾
也溫厚

也溫故厚
蓄故事

皇太子是也若迺器人於絲竹鼓鞀之間則

是陳惠李微高於匡衡可相國也

陳惠李微二人
皆黃門鼓吹也

於是

帝默然而笑竟寧元年帝寢疾傅昭儀及定陶王常在

左右而皇后太子希得進見帝疾稍侵意忽忽不平

稍侵

言漸篤也
平和也

數問尚書以景帝時立膠東王故事是時太

子長舅陽平侯王鳳爲衛尉侍中與皇后太子皆憂不

知所出

不知計所出

丹以親密臣得侍視疾候帝間獨寢時

丹直入卧内頓首伏青蒲上

以青規地曰青蒲自非皇后不得至此

涕泣

言曰皇太子以適長立十餘年名號繫於百姓天下莫

不歸心臣子

自託爲臣子

見定陶王雅素愛幸今者道路流

言爲國生意以爲太子有搖動之議審若此公卿以下

必以死爭不奉詔臣願先賜死以示羣臣天子素仁不

忍見丹涕泣言又切至帝意大感喟然太息曰吾日困

劣而太子兩王又少意中戀戀亦何不念乎然無有此
議且皇后謹慎先帝又愛太子吾豈可違旨駙馬都尉

安所受此語丹即却頓首曰愚臣妄聞罪當死

却退也
離青蒲

二席地

帝因納謂丹曰吾病寢加恐不能自還

寢漸也善輔

道太子母違我意丹噓唏而起太子由是遂為嗣矣

班伯成帝時為侍中光祿大夫伯况之子也况女為帝

婕妤帝自大將軍薨後

王鳳也

富平定陵侯張放淳于長

等始愛幸出為微行行則同輿執御入侍禁中設宴飲

之會及趙李諸侍中皆引滿舉白

謂引取滿觴而飲舉觴告白盡杯也一說

白者罰爵之名也飲有不盡者則以此爵罰之

魏文侯與大夫飲酒令曰不酹者罰以大白談笑大

噱噱笑聲也

時乘輿幄坐張畫屏風畫紂醉踞妲已作長夜

之樂帝以伯新起數目禮之

視而作敬戒狀

顧指畫而問伯紂

為無道至於伯新對曰書云乃用婦人之言何有踞

肆於朝

肆放也陳也

所謂衆惡歸之不如是之甚者

子貢曰紂之不

善不如是之甚也是以君子惡居下流天下之惡皆歸焉故伯引此為言

帝曰苟不若此此

圖何戒伯曰沈湎于酒微子所以告去也

微子殷之卿士封於微爵

稱子也殷紂錯亂天命微子作誥告箕子比干而去紂其誥曰用沈酗于酒用亂厥德于下我其發出狂吾

家耄遜於荒事式號式呼大雅所以流連也大雅蕩之詩曰式號

見尚書微子篇式號式呼大雅所以流連也詩曰式號

式呼俾畫作夜言醉酒號呼以晝為夜也流連言作詩之人嗟嘆而涕泣流連也而說者乃以流連為荒亡蓋

失之矣大雅所以流連不謂飲酒之人也詩書淫亂之戒其原皆在於酒帝

乃喟然嘆曰吾久不見班生今日復聞讜言讜言善言也放

等不懌懌悅也稍自引起更衣罷出

後漢樊儵光武舅宏之子也為長水校尉明帝時上言郡國舉孝廉率取年少能報恩者者舊大賢多見廢棄

宜敕郡國簡用良俊又議刑辟宜須秋月以順時氣帝
並從之

馬嚴伏波將軍援之兄子援小女爲明帝后章帝即位
徵拜侍御史中丞其年冬有日食之灾嚴上封事曰臣聞
日者衆陽之長食者陰侵之徵書曰無曠庶官天工人
其代之言王者代天官人也故考績黜陟以明褒貶無
功不黜則陰盛凌陽臣伏見方今刺史太守專州典郡
不務奉事盡心爲國而司察偏阿取與自己同則舉爲

尤異異則中以刑法不即垂頭塞耳採求財賂今益州
刺史朱酺楊州刺史倪說涼州刺史尹業等每行考事
輒有物故又選舉不實曾無貶坐是使臣下得作威福
也故事州郡所舉上奏司直察能否以懲虛實今宜加
防檢式遵前制舊丞相御史親治職事唯丙吉以年老
優游不察吏罪於是宰府習為常俗更共罔養以崇虛
名或未曉其職便復遷徙誠非建官賦祿之意宜勅正
百官各責以事州郡所舉必得其人若不如言裁以法

令傳曰太上以德服民其次莫如猛故火烈則人望而畏之水懦則人狎而翫之爲政者寬以濟猛猛以濟寬如此綏御有體灾眚消矣書奏納其言而免酺等官

馬廖援之子章帝時爲衛尉帝甚尊重之時皇太后躬履節儉事從簡約廖慮美業難終上疏長樂宮以勸成德政曰臣按前世詔令以百姓不足起於世尚奢靡故元帝罷服官成帝御浣衣哀帝去樂府然侈費不息至於衰亂者百姓從行不從言也夫改政移風必有其本

傳曰吳王好劍客百姓多創瘢楚王好細腰宮中多餓
死長安語曰城中好高髻四方高一尺城中好廣着四
方且半額城中好大袖四方全疋帛斯言如戲有切事
實前下制度未幾後稍不行雖或吏不奉法良由慢起
京師今陛下躬服厚繒斥去華飾素簡所安發自聖性
此誠上合天心下順民望浩大之福莫尚於此陛下既
已得之自然尤宜加以勉勗法太宗之隆德戒成哀之
不終易曰不恆其德或承之羞誠令斯事一竟則四海誦

德聲薰天地神明可通金石可勒而況於行仁心乎況於行令乎願置章坐側以當瞽人夜誦之音太后深納之朝廷大議輒以詢訪

鄧康以和熹皇后從兄爲越騎校尉康以太后久臨朝政宗門盛蒲數上書長樂宮諫諍宜崇公室自損私權言甚切至太后不從

梁商爲大將軍女即順帝后也永和四年中常侍張逵遂政等共譖商事敗伏誅辭所連染及在位大臣商懼

多侵枉乃上疏曰春秋之義功在元帥罪止首惡故賞不僭溢刑不淫濫五帝三王所以同致康乂也竊聞考中常侍張達等詞語多所牽及大獄一起無辜者衆死囚久繫織微成大非所以順迎和氣平政成化也宜蚤訖竟以止逮捕之煩帝乃納之罪止坐者

竇武女爲桓帝后武於延熹中爲城門校尉時國政多失內官專寵李膺杜密等爲黨事考逮永康元年武上疏諫曰臣聞明主不諱譏刺之言以探幽暗之實忠臣

不恤諫諍之患以暢萬端之事是以君臣並熙名達百世臣幸得遭聖明之世逢文武之化豈敢懷祿逃罪不竭其誠陛下初從藩國爰登聖祚天下逸豫謂當中興自即位以來未聞善政梁孫寇鄧雖或誅滅而常侍黃門續爲禍虐欺罔陛下競行譎詐自造制度妄爵非人朝政日衰姦臣日強伏尋西京放恣王氏佞臣執政終喪天下今不慮前事之失復循覆車之軌臣恐二世之難必將復及趙高之變不朝則夕近者姦臣牢修造設

黨議遂收前司隸校尉李膺太僕杜密御史中丞陳翔
太尉掾范滂等逮考連及數百人曠年拘錄事無效驗
臣推膺等建忠抗節志經王室此誠陛下稷契伊呂之
佐而虛爲姦臣賊子之所誣抵天下寒心海內失望惟
陛下留神澄省時見理出以厭人鬼喁喁之心臣聞古
之明君必須賢佐以成政道今臺閣近臣尚書令陳蕃
僕射胡廣尚書朱密荀緄劉祐魏朗劉矩尹勲等皆國
之貞士朝之良佐尚書郎張陵媯皓苑康楊喬遙韶戴

恢等文質彬彬明達國典內外之職羣才並列而陛下
委任近習專樹饗饗外典州郡內幹心膂宜以次貶黜
按罪糾罰抑奪官爵欺國之封按其無狀誣罔之罪信
任忠良平決臧否使邪正毀譽各得其所實愛天官惟
善是授如此咎徵可消天應可待間者有嘉禾芝草黃
龍之見夫瑞生必於佳士福至實由善人在德爲瑞無
德爲灾陛下所行不合天意不宜稱慶書奏因以病上
還城門校尉槐里侯印綬帝不許有詔原李膺杜密等

自黃門北寺若盧都內諸獄繫囚罪輕者皆出之

魏卞蘭武帝卞后弟秉之子明帝時蘭見外有二難而帝留意於宮室嘗因侍從數切諫帝雖不能從猶納其誠款蘭位至散騎常侍

吳滕喬封都亭侯弱冠尚公主每上表陳及時宜及民間優劣多所輔弼

晉庾冰以后兄輔政康帝即位求出鎮武昌臨發上疏曰臣因循蒙寵冠冕當世而志無殊操量不及遠頃皇

家多難釁故頻仍朝望國器與時殲落遂今天眷不墜
降及臣身俯仰伏事於今五年上不能光贊聖猷下不
能緝熙朝政而陛下過之過分求之不已復策敗駕之駟
以冀萬里之功非天眷之隆將何以至此是以敢竭狂
瞽以獻血誠願陛下暫屏旒纒以弘聽納今彊寇未殄
戎車未戢兵弱於郊人疲於內寇之侵軼未可量也黎
庶之困未之安也羣才之用未之盡也而陛下崇高事
與下隔視聽察覽必寄之羣下羣下宜忠不引不進百

司宜勤不督不勸是以古之帝王勤於降納雖日總萬
幾猶兼聽將相或借訟輿人或求謗芻蕘良有以也况
今日之弊開闢之極而陛下歷數屬當其運否剝之難
嬰之聖躬普天所以痛心於既往而傾首於將來者也
實冀否終而泰屬運在今誠願陛下弘天覆之量深地
載之厚宅冲虛以爲本勤訓督以爲務廣引時彥詢于
政道朝之得失必關聖聽人之情僞必達天聽然後覽
其大當以總國綱恭儉節用堯舜豈遠大布之衣衛文

何人是以古人有云非知之難行之難非行之難安之難也願陛下既思日側於勞謙納其起予之情則天下幸甚矣臣朝夕服膺猶不能暢臨疏徘徊不覺辭盡

後魏胡虔字僧敬靈太后從子太后既再臨朝恩威不立鄭儼等汙亂宮掖僧敬因聚集親族遂涕泣諫曰陛下母儀海內豈宜輕脫如此太后太怒自是不召僧敬虔爲吏部郎中太后好與家人禮與親戚宴戲虔常致諫由是後宴虔不得預焉

賢行

夫高而不危動罔不吉蓋貴而能降行之爲艱况夫漸
潤皇嬖託屬丹掖析圭分爵累紫重金而能敦尚素風
裁損貴勢以恭肅而逮下以矜嚴而奉上極孝弟之性
循遜讓之則表率於后族流譽於薦紳因能永列土之
封免傾軛之歎傳所謂帝王有外戚之助者其以是夫
漢竇長君文帝竇后兄廣國字少君后弟也后立家於
長安絳侯灌將軍乃選長者之有節行者與居竇長君少
君由此爲退讓君子不敢以富貴驕人

衛青衛皇后弟爲大將軍青仁善喜士退讓

王商字子威父武以宣帝舅封爲樂昌侯商少爲太子中庶子以肅敬敦厚稱父薨商嗣爲侯推財以分異母諸弟身無所受居喪哀戚於是大臣薦商行可以厲羣臣義足以厚風俗宜脩近臣由是擢爲諸曹侍中中郎將

史丹字君仲父高衛太子良娣兄子也宣帝時封樂陵侯丹以父任爲中庶子成帝時封左將軍丹爲人足知

愷悌愛人心甚謹密

馮參字叔平姊成帝昭儀也參少爲黃門郎給事中爲人務嚴好修容儀進退恂恂甚可觀也參昭儀少弟行又敕備以嚴見憚

後漢馬光援之子也光爲衛尉援女爲明德皇后光爲人小心周密喪母過哀

東觀記云光遭母喪哀痛感傷形骸骨立

帝以是特

親愛之

樊儵字長魚宏之子宏卽世祖舅也儵謹約有父風事

後母至孝及母卒哀思過禮毀病不自支世祖嘗遣中書黃門朝暮送饘粥儉位至燕侯

陰嵩興從兄也建武中爲中書郎將監羽林十餘年以謹勅見幸

陰慶興子也封鮟陽侯慶推田宅財物悉與弟員丹明帝以慶義讓擢爲黃門侍郎

鄧閻和熹皇后之弟也母新野君寢疾與兄隲並上書求還侍養太后以閻最少孝行尤著特聽之賜安車駟

馬及新野君薨隲等復乞身行服章連上太后許之既還里第並居塚次間至孝骨立有聞當時

鄧康和熹皇后從兄也少有操行順帝時為太僕有方正稱名重朝廷

梁商少以外戚為郎中遷黃門侍郎順帝選商女為后位大將軍商天資聰敏昭達萬情舉措動作直推雅性務在誠實不為華飾孝友著於閭閻明信結於友朋其在朝廷儼恪矜嚴威而不猛退食私館接賓待客寬和

肅敬憂人之憂樂人之樂皆若在已輕視財貨不爲蓄積故衣裘裁足卒歲奴婢車馬供用而已朝廷由是敬憚委任焉每有饑饉輒載租穀於城門賑與貧餒不宣已惠

晉羊祜字叔子景獻皇后同產弟祜年十二喪父孝思過禮事叔父耽甚謹位至征南大將軍開府儀同三司庾袞字叔褒明穆皇后伯父也少履勤儉篤學好問事親以孝稱咸寧中大疫二兄俱亡次兄毗復殆羸氣方

熾父母諸弟皆出次於外衮獨留不去諸父兄強之乃
曰衮性不畏病遂親自扶持晝夜不眠其間復撫柩哀
臨不輟如此十有餘旬疫勢既歇家人乃反毗病得差
衮亦無恙父老咸曰異哉此子守人所不能守行人所
不能行歲寒然後知松栢之後凋始知疫癘之不能相
染也後州郡察孝廉舉秀才清白異行皆不降志

宋趙倫之字幼成下邳僮人也武穆皇后之弟幼孤貧
事母以孝稱位至領軍將軍

徐湛之母高祖長女會稽公主湛之早孤及長頗涉文
義善自衛侍事祖母及母並以孝謹聞位至尚書僕射
領護軍將軍

南齊江祐姑爲景皇后祐爲太子詹事勢冠當時然家
行甚睦待子姪有恩意

梁張弘榮字真簡范陽方城人文獻皇后之從父弟也
幼以孝聞母嘗有疾五日不食弘榮亦不食母強爲進
粥乃食母所餘遭母憂三年不食鹽菜幾至滅性兄弟

友愛不忍暫離其室嘗同卧起世稱爲名家位至散騎
常侍

後魏姚黃眉太宗昭哀皇后之弟也黃眉尚陽翟公主
爲太常卿卒黃眉寬和溫厚希言得失太武悼惜之

後周尉遲迴即宣帝皇后祖也性至孝色養不怠身常
在外所得四時甘脆必先薦奉然後敢嘗位至柱國大
將軍

唐吳湊代宗之舅也大歷十四年以左金吾衛將軍左

衛使乞罷官侍親時母老有疾特許之

禮士

外戚之貴顯莫盛於兩漢其或負器識當柄用靡不好
彼功名傾諸將相進家居之時俊結赴義之俠少損威
重而入閭巷設盛饌而盡歡談亦有閉戶以固辭弗奪
其節投劾而憤去終加辟命禮士之道斯焉可觀

漢竇嬰孝文竇后從兄子喜賓客破七國封魏其侯游
士賓客爭歸之

田蚡孝景皇后同母弟武帝初即位蚡以舅封爲武安

侯新用事卑下賓客進名士家居者貴之

滯在里巷未仕者

欲

以傾諸將相

傾謂踰越而勝之也

上所鎮撫多蚡賓客計策

王譚封平阿侯與成都侯商紅陽侯立曲陽侯根高平

侯逢時皆元后之同產皆通敏人事好士養賢傾財施

予以相高尚樓護爲天水太守數歲免家長安中商爲

大司馬衛將軍罷朝欲候護其主簿諫將軍至尊不宜

入閭巷商不聽遂往護家家狹小官屬立車下久住移

時天欲雨主簿謂西曹諸掾曰不肯強諫反雨立閭巷
商還或白主簿語商恨以它職事去主簿終身廢錮
後漢郭况建武中封綿蠻侯以后弟貴重賓客輻輳况
恭謙下士頗得聲譽

陰就建武中以后弟嗣父封新陽侯就以外戚貴顯深
敬重馮衍衍遂與之交結就既慕朱暉賢自往候之暉
避不見復遣家丞致禮暉遂閉門不受就聞嘆曰志士
也勿奪其節又與帝婿梁松皆慕楊政聲名而請與交

友政每共言論嘗切磋懇至不爲屈撓時帝子沛獻王
輔等皆好賓客請并丹不能致就以外戚別使人要劫
之丹不得已既至就故爲設麥飯葱菜之食丹推去曰
以君侯能供養故來何爲如此就便設饌就起左右進
輦丹曰昔桀人輦即此也坐上失色就去輦歡談終日
乃去

馬廖明帝永平中爲羽林左監虎賁中郎將與侍中竇
憲並京師貴戚時江革爲冬官中郎將廖等各奉書致

禮

馬防廖弟也章帝建初中為車騎將軍時傳毅以文雅顯於朝廷防請毅為軍司馬待以師友之禮

竇憲建初中以后兄為侍中章帝謂憲曰卿寧知崔駰乎對曰班固數為臣說之然未見也帝曰公愛班固而忽崔駰此葉公之好龍也試請見之駰繇此候憲憲倒屣迎門笑謂駰曰亭伯吾受詔交公公何得薄哉遂揖入為上客

梁商爲大將軍自以戚屬居大位每存謙柔虛已進賢
辟漢陽巨覽上黨陳龜爲掾屬李固周舉爲從事中郎
於是京師翕然稱爲良輔順帝委任焉

何進女弟爲靈帝后進爲河南尹遷爲大將軍司徒楊
賜遣掾孔融奉謁賀進不時通融即奪謁還府投劾而
去河南官屬耻之私遣劍客欲追殺融客有言於進曰

孔文舉有重名

融家傳曰客言於進曰孔文舉於時英雄特傑譬諸物類猶衆星之有北辰百

穀之有黍稷天下莫不屬目也

將軍若造怨此人則四方之士引領而

去矣不如因而禮之可以示廣於天下進然之既拜而
辟融舉高第為侍御史

宋蕭思話孝懿皇后弟子也宗戚令望早見任待凡歷
十二使節監都督九馬愛才好士人多歸之

論薦

傳曰自古受命繼體之君非獨內德茂也蓋亦有外戚
之助焉夫肺腑之親河潤之族光寵隆極褻慢常生而
能為國辨材屈身逮下推引髦乂登庸俊良降自漢興

間世而有所以佑輔邦政恢崇帝圖宜乎表世適之助
受加地之賞雖重金累紫益無愧焉

漢王鳳以元后兄爲大將軍時執金吾辛慶忌左遷酒
泉太守歲餘鳳薦慶忌前在兩郡著功績徵入歷位朝
廷莫不信鄉質行正直仁勇得衆心通於兵事明略威
重任國柱石任堪也父破羌將軍武賢顯名前世有威西
夷臣鳳不宜久處慶忌之右右上也乃復徵爲光祿大夫

執金吾

後漢樊儵字長魚父宏光武之舅也儵爲長水校尉北海周澤琅邪承宮並海內大儒儵皆以爲師友而致之於朝

陰興光烈皇后之母弟與同郡張宗上谷鮮于裒不相好知其有用猶稱所長而達之代吳漢爲大司馬興疾病光武親臨問以政事及羣臣能否興頓首曰臣愚不足以知之然伏見議郎席廣謁者陰嵩並經行明深踰於公卿興沒後帝思其言遂擢廣爲光祿勳嵩爲中郎

將監羽林

竇憲章德皇后之兄和帝即位憲爲大將軍輔政以前

太尉鄧彪有義讓先帝所敬而仁厚委隨

委隨猶順從也

故尊

崇之以爲太傅令百官總已以聽帝既富於春秋憲自

以外戚之重欲令少主頗涉經學以屯騎校尉桓郁累世

帝師而性和退自守故上書皇太后曰禮記云天下之

命懸於天子天子之善成乎所習習與智長則切而不

勤化與心成則中道若性昔成王幼小越在襁褓周公

在前史佚在後太公在左召公在右中立聽朝四聖維之是以慮無遺計舉無過事孝昭皇帝八歲即位大臣輔政亦選名儒韋賢蔡義夏侯勝等入授於前卒成聖德近建初九年張酺魏應召訓亦講禁中伏惟皇帝陛下躬天然之姿宜漸教學而獨對左右小臣未聞典義昔五更桓榮親爲帝師子郁結髮敦尚繼傳父業故再以校尉入授先帝父子給事禁省更歷四世今白首好禮經行篤備又宗正劉方宗室之表善爲詩經先帝所

褒宜令郁方並入教授以崇本朝光示大化由是遷郁
長樂少府復入侍講

鄧騭以和熹皇后諸父爲大將軍安帝時遭元元之灾
人士荒饑死者相望盜賊羣起四夷侵畔騭與弟弘惺
閻等崇節儉罷力役推進天下賢士何熙殺諷羊祜李
邵陶敦等列於朝廷故天下復安先是侍中魯丕免永
初二年詔公卿舉儒術篤學者騭舉丕再遷復爲侍中左
中郎將

何進以靈帝后父爲大將軍秉政徵海內名士荀攸等
二十餘人舉孔融高第爲侍御史

晉褚裒康獻皇后父爲征北大將軍以政道在於得
才宜委賢任能外敬舊齒乃薦前光祿大夫顧和侍中
殷浩疏奏即以和爲尚書令浩爲揚州刺史

梁張弘策文獻皇后從父弟從高祖平建康天監初爲
散騎常侍盡忠奉上知無不爲交友故舊隨才薦拔縉
紳皆趨焉

唐楊國忠天寶中為右相太真妃即從祖妹也國忠以
聲名自高搜天下奇傑聞張鎬名召見薦之自釋褐官拜
左拾遺

冊府元龜卷三百四